

Josué

Dios a hasi promesanan grandi na Su pueblo skohí, Israel. El a primintí ku E lo bendishoná henter mundu dor di nan (Génesis 12:3). Pentatuk a konta kon Dios a kumpli ku sierto asepekto di e promesanan ei. Ma tin otro parti di e promesanan ku no a wòrdu kumplí den e promé sinku buki di Beibel.

Dios tabata prepará e pueblo dor di kende e Mesias lo bin. Un parti di e preparashon pa Su binida kumplimentu di Su promesa ku nan lo tin nan mes tera, e Tera Primintí (Génesis 12:7; 13:14-17; 15:7; èts.). Kumplimentu di e promesa aki t'e foko di buki di Josué.

Josué ta kompletá e sinku bukinan di Moises i ta introdusí e bukinan históriko di Tèstament Bieu. Den Pentatuk, Moises a guia pueblo di Israel *te na* e Tera Primintí. Den e buki aki, Josué a hiba e pueblo *den* e tera.

E buki di Josué no solamente tin lasonan ku Pentatuk. E buki spesífikamente ta hopi ligá ku e último buki di Pentatuk, Deuteronomio. Entre otro, Deuteronomio a presentá Josué komo e sucesor di Moises skohí pa Dios (1:38; 3:21,28; 31:3; 34:9). E buki di Josué ta presentá Josué den e ròl di lider di Israel. Kasi por bisa ku Josué a kompletá e trabou di Moises. Meskos ku Deuteronomio ta klousurá ku morto di Moises, igualmente, Josué ta klousurá ku morto di un otro gran lider, Josué. Deuteronomio a prepará e pueblo pa drenta e Tera Primintí; Josué ta deskribí nan entrada. Akan a wòrdu kastigá segun instrukshon di Deuteronomio 13. Bendishonnan i maldishonnan ta presentá na Israel den tur dos buki (Deuteronomio 28; Josué 23:14-16). Ningun por para dilanti Israel (1:5) manera Deuteronomio 1:25 a primintí. Maribombanan a kore ku e enemigunan (24:12; Deuteronomio 7:20). Ma e similaridatnan ta muchu mas profundo. Asta a manera ku e outornan a ekspresá nan mes ta hopi similar.

I. NÒMBER DI E BUKI

E buki ta haña su nòmber di e persona prominente den e buki, Josué. Na idioma hebreo, su nòmber ta HEHOSHUA. E nòmber ta ligá ku diferente nòmber den Tèstament Bieu. Por ehèmpel, Josué tabata yamá “Oseas” den Numbernan 13:8,16, un nòmber ku ta nifiká “salbashon”. Tin otro nòmber hebreo, pero nan ta tradusí “Josué” den nos Beibel na Papiamento. Josué ta nifiká “Jehova ta salvashon” òf “salba, Jehová” ...un nòmber apropiá pa esun ku Dios a skohe pa guia Su pueblo den e Tera Primintí.

Na idioma griego, “Hesus” ta un forma di e nòmber Josué. Kòrdando nifikashon di e nòmber Josue, ta splika dikun e angel a bisa Jose, “...*lo bo dun’E e nòmber Jesus, pasobra ta E ta Esun ku lo salba Su pueblo di nan pikánan*” (Mateo 1:21).

Moises tabata e persona prinsipal den Pentatuk. E outor di buki di Josué ta duna e impreshon kla ku Josué ta sigui ku e trabou di Moises. Moises tabata konosí komo e “*sirbidó di SEÑOR*”. Ma Josué a bira lider di Israel, i e tambe tabata yamá “*sirbidó di SEÑOR*” (Josué 24:29).

E buki ta habri mustrando ku Josué a wòrdu apuntá komo sucesor di Moises. Di bèrdat, Moises a selekt’é komo su sucesor promé ku el a fayesé (Numbernan 27:12-23; Deuteronomio

31:1-8). E ta e persona ku ta destaká den e buki. Manera Moises, e tabata e lider den asuntonan religioso, militar, sivil, i sosial. Dor ku Josué ta e persona prinsipal den e buki aki, talbes lo ta bon pa introdusí e persona aki.

Numbernan 13:8 ta laga sa ku Josué tabata di e tribu di Efrain. Nòmber di su tata tabata Nun. El a bira e sirbidó personal di Moises (Eksodo 24:13; 33:11).

Josué a prepará pa liderato spiritual for di un edat hóben. E so tabatin e privilegio di kompañá Moises riba seru di Sinai ora Moises a haña e Dies Mandamentunan (Eksodo 24:12-13). El a demonstrá set pa Dios, kedando na e lugá santu ora Moises a regresá na e kampamentu (Eksodo 33:11).

Ta pusibel ku Josephus tabatin rason ora el a bisa ku Josué lo a sirbi den ehersito di Egipto promé ku e eksodo i lo a haña training komo sòldá. Kisas ku su eksperensia militar, Josué tabata un di esnan ku a yuda organisá e eksodo—pa esaki bai na un manera organisá i na òrdu, marchando huntu. Di tur manera, Moises a apunt'é komo e lider pa bringa kontra Amalèk (Eksodo 17:8-16). Tambe e tabata un di e diesdos persona ku a bai spioná e tera di Kanaan (Numbernan 13:1-25).

Di e diesdos spion, Josué i Kalèb so a konfia Dios pa entregá e Tera Primintí den man di Israel, maske e otro dies spion a nenga ku nan por hasi esei (Numbernan 13:1-14:9). Komo rekompensa, Dios a pèmití nan so di tur e hòmbenan di Israel binti aña bai ariba pa dreña e Tera Primintí.

II. SKIRBIMENTSU DI E BUKI

Den pasado, diferente teólogo a inisistí ku e buki di Josué no por a wòrdu skirbí dor di ún persona. Ma ora nos ta opservá e diferente stail di literatura i kontenido den e buki—storianan, deskripsion geográfiko, spiertamentu—esei ta un demonstrashon kla ku e buki ta forma un unidat, i ku ta mas probabel ku ta ún outor so a skirbié.

No tin duda ku e outor a hasi uso di otro dokumento. E eskritor a referí spesífikamente na e “*buki di Jaser*” (10:13). Josué tambe a laga traha un dokumento, deskribiendo e teritorio (18:9). Ademas, Josué mes a skirbi e palabranan di e aliansa ku el a sera ku pueblo di Israel (24:25-26). I, komparando 6:26 ku 1 Reinan 16:34, ta parse ku Josué lo a skirbi e palabranan di e maldishon.

Ken tabata outor di buki di Josué? E buki no ta duna e kontesta. E buki ta entitulá “Josué”, ma esei no ta indiká ku e ta outor di e buki. Josué tabata mas bien e lider di e Israelitanan ora nan a konkistá e Tera Primintí. I nos tin ku kòrda ku e título no ta inspirá—nan a wòrdu agregá despues ku e buki a wòrdu skirbí.

Ken anto a skirbi e buki di Josué? Tin diferente punto di bista tokante esaki.

Algun religioso di doktrina liberal ta di opinion ku un persona durante reinado di e mal rei Manasés a skirbi e buki, 800 aña despues ku a eventonan deskribí den e buki di Josué a tuma lugá. Ma tin evidensia kla den e buki ku e no ta asina bieu.

- E buki lo a wòrdu skirbí promé ku reinado di Salomon. Josué 16:10 ta bisa ku e kananeonan a biba na Gezer. Segun 1 Reinan 9:16, Farao a mata e kananeonan ku a biba na Gezer durante reinado di Salomon.
- Sigur e buki di Josué a wòrdu skirbí promé ku reinado di David. Segun Josué 15:8,63, e jebuseonan tabata biba na Yerusalem “*te dia djawe*”. Ma 2 Samuel 5:5-9 ta laga sa ku David a kore ku e jebuseonan di e siudat ei na kuminsamentu di su reinado.
- Ademas, ta parse ku e buki lo a wòrdu skirbí promé ku reinado di Saul. Segun Josué 9:27, e gabaonitanan tabata sirbidónan di Israel te “*te dia djawe*”. Ma 2 Samuel 21:1-9 ta revelá ku Saul a mata hopi gabaonita apesar di Israel su promesa na nan.
- Tin evidensia ku e buki a wòrdu skirbí promé ku e di 12 síglo. Ta parse ku Sidon tabata konsiderá e stat prinsipal di Fenisia (11:8; 13:4-6; 19:28). Ma Tiro a bira e stat prinsipal di Fenisia na lugá di Sidon na 1200 B.C.

- Ta parse ku e filisteonan no tabata un menasa ainda na parti sùit di e Tera Primintí. E filisteonan ta menshoná den e buki solamente den 13:2-4. Ta parse ku e kananeonan tabata e enemigu prinsipal di e region ei. E filisteonan a invadí i habitá e region ei mas òf ménos den e di 12 sigo B.C.
 - Rahab tabata na bida ainda ora e buki a wòrdu skirbí (Josué 6:25).
 - E outor a bisa ku riu Jordan a seka “*te ora nos a krusa*” (5:1 – segun nos ta komprendé e gramatika hebreo). Tambe el a bisa di e Tera Primintí, “*e tera ku SEÑOR a hura nan tatanan ku E lo a duna nos*” (Josué 5:6). Esaki ta mustra ku e outor tabata presente durante e konkísta. E mes tabata testigu di e eventonan.
- Ken anto a skirbi e buki? Ningun hende sa sigur. Ma tin diferente pusibilidadat:

A. JOSUÉ

Josué mes por a skirbi sierto parti di e buki. Talbes el a skirbi mayoria di e buki. Josué 8:32 i 24:26 ta laga sa bon kla ku Josué a skirbi sierto dokumento. Ademas, Josué 5:13-15 ta relatá algu ku Josué a eksperensia ora e tabata su so. Josué so tabata sa di esaki originalmente. E so por a duna e informashon aki.

Ma sigur Josué no por ta outor di henter e buki. Entre otro, e outor a skirbi tokante morto di Josué. Talmud ta bisa ku “Josué a skirbi su mes buki” ku eksepshon di su final. Segun e perspektiva aki, Eleazar, e sumosaserate, a skirbi tokante e morto di Josué (24:29-32) i ku Eleazar su yu, Finees, e siguiente sumosaserdote, a skirbi 24:33.

Ma ta parse ku algun otro evento menshoná den e buki a tuma lugá despues ku Josué a muri. Pues, Josué no por a skirbi di e eventonan ei tampoko. Por ehèmpel:

- Dan su konkísta di Lesem ta menshoná den Josué 19:47 ma no a sosodé te despues di morto di Josué (Huesnan 17-18). Un indikashon ku e susésu aki no a tuma lugá te despues di Josué su morto ta pa motibu di e idolatria ku tabata tuma lugá, algu ku no tabata e kaso durante bida di Josué (Josué 24:31).
- Nòmber di e siudat di Horma a wòrdu kambiá despues di morto di Josué (Huesnan 1:1,17). Den buki di Josué sinembargu, e nòmber usá pa e siudat ta Horma (Josué 12:14; 15:30; 19:4). Ta parse ku mas nòmber nobo di otro stat ta menshoná: Baala a bira Kiriath-jearim (15:9), Arba su nòmber a kambia pa Hebròn (15:13), i Kiriath-sana a bira Debir (15:49).
- E konkísta di “*henter e tera di e heteonan*” (Josué 1:4) no a tuma lugá te despues di morto di Josué.
- Josué 15:15-19 ta konta ku Otoniel a kaptúra Debir, un evento ku por a tuma lugá despues di morto di Josué (Huesnan 1:1,11-15).
- Algun estudiante di Beibel ta haña ku Kaleb su konkísta di Hebron, menshoná den e buki di Josué (Josué 15:13-14), no a tuma lugá durante bida di Josué (Huesnan 1:1,10,20). Ma di otro banda, no ta probabel ku Kaleb tabata mas hóben ku 85 aña (Josué 14:10) tempu ku Josué a muri ku 110 aña (Josué 24:29). Probablemente edat di Josué i Kalbe no tabata tan diferente.

No tin evidencia sólido ku ta desprobá ku Josué a skirbi e buki. Konsiderando e puntonan ya kaba menshoná, pusíbelmente Josué a skirbi diferente dokumento i un òf otro persona a kompilá nan despues di su morto, inkluiendo sierto otro informashon.

B. FINEES

Di nos punto di bista, Finees ta un mihó pusibilidadat ku Josué. E sumosaserdote, Finees, yu di Eleazar, ta e último persona menshoná den e buki (24:33). Finees a para firme pa Señor ora e moabitanan a sedusí e israelitanan (Numbernan 25:7-13). El a bai guera kontra e moabitanan, matando Balaam (Numbernan 31:6-8). Finees, no Josué, tabata esun prominente resolviendo un konflikto den Josué 22:10-34.

Ta parse ku Finees a nase na Egipto (Eksodo 6:25) i lo tabatin kuarenta piku aña tempu ku Israel a dreña e Tera Primintí porfin. Si Finees a biba te nobenta piku aña, e lo a biba basta aña pa sa di e eventonan deskribí den e buki. Ademas, komo sumosaserdote, e lo a konosé Jousé suficiente bon ku e Josué lo a kont'é di su eksperensianan persona (p.e. 5:13-15). Finees mes a haña su erensia den e serunan di Efrain (Josué 24:33).

C. UN SASERDOTE ONÓNIMO KU A KONOSÉ FINEES BON

E buki ta demonstrá interes partikular pa e tribu di Juda, ku interes mas spesífiko pa e siudat di Hebron (Josué 10:36-37; 14:6-15; 15:13-14; 20:7; 21:1-13). E ta duna hopi mas detaye di e kampaña militar na parti sùit di e Tera Primintí (10:1-43) i ta duna mas informashon tokante su frontera (15:1-63). E echu ku e ta ripití ku e tribu di Levi no a haña teritorio (13:14,33; 14:3-4; 18:7), talbes ta indiká ku e tabata un levita òf un saserdote. I e outor sigur ta demonstrá ku e konosé e bukinan di Numbernan i Deuteronomio hopi bon.

Fecha di e konkista di e Tera Primintí dor di Israel no ta konosí eksaktamente. Ma en general ta pensá ku e eksodo a tuma lugá na mas òf ménos aña 1446 B.C. Esei ke men ku e konkista lo a kuminsá na aña 1406 B.C.

Si Josué ta outor di e buki, anto e lo mester a skirbi e buki promé ku su morto na edat di 110 aña (24:29). Pusfelmente el a skirbi e buki trinta aña despues ku e konkista di Kanaan a kuminsá. Si esei ta e kaso, mas promé ku e buki por a wòrdu skirbí lo ta 1376 B.C.

Si Finees òf un otro saserdote onónimo tabata e outor, e buki por a wòrdu skirbí algun dékada mas despues. E palabranan “*te dia djawe*”, ku ta aparesé ku frekuensia den e buki (4:9; 5:9; 6:25; 7:26; 8:28-29; 9:27; 10:27; 13:13; 15:63; 16:10; 23:9), ta duna impreshon ku un periodo di tempu a pasa despues ku e eventona a sosodé...maske e no ta indiká kuantu tempu a pasa. Josué 6:25 ta duna impreshon ku Rabah tabata na bida ainda ora e buki a wòrdu skirbí. Pues, talbes un fecha di 1350 B.C. por ta un fecha rasonabel si Finees òf un saserdote onónimo tabata outor di e buki di Josué.

III. LEKTORNAN DI E BUKI

Moises a skirbi sinku buki, konosí komo Pentatuk. E bukinan aki ta konta di kreashon, e origen di e pueblo di Israel, nan esklabitut na Egipto, kon nan a wòrdu librá, i instrukshon spesífiko pa nan. Sin duda Moises a skirbi e bukinan aki pa e pueblo hudiu. Den e Pentatuk, Dios a hasi diferente promesa na Israel, entre otro ku nan lo eredá e Tera Primintí.

E buki di Josué ta sigui inmediatamente despues di Pentatuk. Di bèrdat, Josué ta un kontinuashon di Deuteronomio. Moises a muri na final di Pentatuk. Josué ta kuminsá ku morto di Moises. E buki aki ta sigui ku e historia di pueblo di Israel i ta mustra bon kla ku Dios ta kumpli ku Su promesanan hasí na Su pueblo, kuminsando ku Abraham.

E bukinan di Moises a wòrdu poné banda di e Arka di Aliansa (Deuteronomio 31:9,24-27). Ta parse ku e mesun kos a sosodé ku e skirbimentunan di e profeta Samuel (1 Samuel 10:25). Ta kasi sigur ku esaki lo a sosodé ku e buki di Josué tambe. E buki lo a wòrdu konsiderá Skritura huntu ku e bukinan di Moises poko tempu despues ku el a wòrdu skirbí. Tur esaki tabata pa benefisiá e pueblo di Dios, Israel.

IV. PROPOSITO DI E BUKI

Ta obvio ku meta di e eskritor di e buki di Josué no tabata pa duna un relato históriko kompleto di e konkista di e Tera Primintí. E eskritor a djis menshoná diferente stat ku a wòrdu konkistá (12:7-24). Hopi di nan ta menshoná di paseo, sin konta mes kon Israel a konkistá e suidat. Igualmente e relato di e konkista di e terirotonan na nort ta suma un total di 15 versíkulo (11:1-15). En kontraste, e relato di Akan su piká i kastigu ta rekerí 26 versíkulo (7:1-26).

Klaramente e eskritor no a konta tur e historia di Israel ku e tabata sa. E tabata hopi selektivo den e informashon ku el a skirbi den e buki. Igualmente, el a eksluí otro informashon interesante...informashon ku no a harmonisá ku e proposito di e outor.

Hudiunan a konsiderá e buki di Josué un buki profétiko. Nan tin rason. Outor di buki di Josué a usa historia komo un oportunidat pa komuniká sierto bèdat teológiko. E eskritor tabata manera un predikador ku ta selektá sierto informashon so pa reta esnan den su kongregashon. Proposito di bukinan profétiko ta pa instruí, reta, i avisá Israel pa keda fiel na e aliansa di Moises. Klaramente e outor tabata muchu mas interesá pa siña siertu lès moral i spiritual ku e tabata den e kronologia di eventonan históriko.

1) Un meta sigur di e buki ta ku Dios ta totalmente konfiabel pa kumpli ku Su promesanan ku El hasí na Abraham dunando su desendientenan e tera ku El a primintí (21:45).

2) Ligá ku esaki, dor di e ehèmpelnan den e buki, nos por dedusí ku un otro proposito di e outor ta pa mostra ku Dios hustu a guia Israel i a protehá nan di kualke peliger ora nan ta obedes'E. Pues, sigur un meta di e buki tabata pa motivá e pueblo hebreo pa obedesé Dios i keda fiel n'E: *"skohe pa boso mes awe kende boso lo sirbí"* (24:15). Por ripará ku e promé 12 kapítulo di e buki ta pone mas énfasis riba Israel su obediensia òf desobediensia ku e ta pone riba konkístanan militar.

3) Talbes un otro proposito lo tabata pa mostra ku Israel ta Dios Su representante pa kumpli ku Su proposito riba tera.

Si e buki aki a wòrdu skirbí na final di Josué su bida òf poko despues, sigur e mensahe aki lo ta hopi relevante. E tentashon pa bandoná Dios tabata hopi fuerte. E buki di Huesnan, ku ta sigui inmediatamente despues di Josué, ta mostra kla ku esei ta presis loke Israel a hasi. I e konsekuensianan tabata teribel. Talbes, e outor, mirando e tendensia aki ya kaba den e pueblo di Israel, a skirbi e buki pa avisá nan di e peliger di bandoná Dios!

V. STRUKTURA DI E BUKI

E buki klaramente ta formá di dos parti. Kapítulonon 1 te 12 ta trata ku e konkísta di e tera. E sekshon aki ta konsistí prinsipalmente di storianan. E outor ta duna impreshon ku ehersito di Israel a empoderá di e Tera Primintí na un forma rápido. E di dos sekshon ta trata ku e kolonisashon di Kanaan...e pueblo ta gosa e Tera Primintí. Na lugá di tantu storia, tin mas listamentu i organisashon.

- I. KONKÍSTA DI KANAAN – 1-12
 - A. Preparashon pa Konkísta - 1:1 – 5:12
 1. Lider nobo pa Israel - 1:1-18
 2. Spionamentu di Jeriko - 2:1-24
 3. Krusamentu di Jordan - 3:1-5:1
 4. Seremonionan na Gilgal - 5:2-12
 - B. E Konkísta - 5:13 – 11:15
 1. E Kampaña Militar na Parti Sentral – 5:13 – 8:35
 2. E Kampaña Militar na Parti Sùit– 9:1 – 10:43
 3. E Kampaña Militar na Parti Nort – 11:1-15
 - C. Resúmen di e Konkísta – 11:16 – 12:24
- II. KOLONISASHON DI KANAAN - 13-24
 - A. Repartishon di e Tera Primintí – 13:1 – 21:45
 1. Mandato dibino pa parti e tera - 13:1-7
 2. Teritorio di e tribunan pariba di Jordan - 13:8-33
 3. Partimentu di e tera na Gilgal - 14:1-17:18
 - a. Komienso di partimentu di Kanaan – 14:1-15
 - b. Teritorio di Hudá - 15:1-63
 - c. Teritorio di tribunan di Jose - 16:1-17:18

4. Partimentu di e tera na Silo - 18:1-21:45
 - a. Introdukahon - 18:1-10
 - b. Tribu di Benjamin - 18:11-28
 - c. Tribu di Simeon - 19:1-9
 - d. Tribu di Zabulon – 19:10-16
 - e. Tribu di Isakar - 19:17-23
 - f. Tribu di Aser – 19:24-31
 - g. Tribu di Nèftalí - 19:32-39
 - h. Tribu di Dan - 19:40-48
 - i. Erensia di Josué - 19:49-51
 - J. Statnan di refugio - 20:1-9
 - k. Statnan di Levitanan - 21:1-42
 - l. Resumen di kolonisashon – 21:43-45
- B. Konsegrashon di e Pueblo Skohí – 22:1 – 24:28
 1. E tribunan pariba ta bai kas - 22:1-34
 2. Josué su despedida di e ansianonan - 23:1-i6
 3. Aliansa nashonal renobá na Sikem - 24:1-28
- C. Epílogo – 24:29-33
 1. Morto di Josué - 24:29-31
 2. Despues di morto di Josué - 24:32-33

Un otro skema simpel ta mira tres divishon den e buki. E divishonnan aki ta deskribí tres akshon den e tera:

- I. DRETRANDO E TERA – 1-4
- II. KONKISANDO E TERA – 5-12
- III. TUMANDO POSESHON DI E TERA – 13-24

VI. OPSERVASHONAN DI E BUKI

Pusíbelmente e buki ta kubri un periodo di binti sinku aña. E buki di Josué tin hopi storia. Ma e tambe tin un deskripsjon di teritorio di kada tribu, listanan di statnan, èts. mará na otro di tal manera ku e ta forma un solo buki. E buki ta trata ku kumplimentu di Dios Su promesa den e konkista di e Tera Primintí (1-12) i den e repartishon di e Tera Primintí (13-22). E buki ta klousurá ku un spiertamente pa keda fiel na SEÑOR pa nan por gosa Su bendishon den e tera.

Laga nos mira awor algun punto mas detayá den e buki awor.

A. DESTRUKSHON DI TUR HABITANTE

Un inkietut di hopi studiante di Beibel, lesando e buki di Josué ta e aparente kontradikshon entre e bondat i stimashon di Dios i Dios Su mandato pa likidá tur e habitantenan di e Tera Primintí, tantu hende hòmber, komo hende muhé, i muchanan (Deuteronomio 7:1-5; 20:16-18; Josué 11:20). Algun religioso asta ta konkluí ku e Dios di Tèstamènt Bieu ta kruel en kontraste di e Dios di Tèstamènt Nobo.

Ma nos tin ku kòrda ku Dios no ta kambia. E Dios di Tèstamènt Nobo ta e mesun Dios di Tèstamènt Bieu. Ripará ku e Dios di Tèstamènt Bieu a tene misericòrdia di e habitantenan di Ninive (Jonas 4:11) i di Israel. Igualmente, e Dios di Tèstamènt Nobo ta kastigá piká tambe (Romanonan 2:1-9; 2 Tesalonisensenan 1:5-9; Revelashon 21:8). Meskos ku El a primintí ku E lo kastigá Su pueblo ora nan bandon'E den Tèstamènt Bieu (Deuteronomio 28:15-68), igualmente El a primintí (i kumpli) pa kastigá nan den Tèstamènt Nobo (Lukas 21:24).

Ma pakiko destruí habitantenan di e Tera Primintí? Nan tabata pió ku tur otro pueblo na mundu? Ta parse ku nan tabata mas responsabel—nan a peka kontra e konosementu spiritual ku

nan lo tabatin. Den e era di Abraham, e rei-saserdote pagano, Melkisedek, a duna testimonio di ún Dios (Génesis 14:18-24). Nan tabata sa di Dios Su kastigu riba Sodoma i Gomora (Génesis 19:1-29). Segun Josué 2:8-11, nan tabata sa di Dios Su obra grandi pa ku Israel den desierto.

Tur e tempu aki, Dios tabatin kompashon pa ku na. El a laga Abraham sa bon kla ku “*e inikidat di e amoreo no ta kompleto ainda*” (Génesis 15:16). El a warda ku pasenshi pa síglonan pa nan repentí. Ma na lugá di esei, durante e tempu ei ta parse ku nan a desaroyá e religion di Baal i a bira un di e pueblonan mas immoral di e era ei. Ta parse ku e lista desagradabel di Levítiko 18 tabata inkluí pasobra eseyan tabata práktikanan di e pueblo pagano di e Tera Primintí. Talbes nan immoralidad flagrante a resultá den enfermedatnan venérikos riba un eskala epidémiko i otro malesanan. Dios a instruí Israel pa likidá nan tur pa protehá nan salú, i sigur pa protehá nan santidat!

E historia di Israel despues di Josué ta mustra bon kla ku Dios tabata sa ku e nashonnan aki lo bira un tentashon pa Su pueblo. Dios a duna instrukshon kla pa mata nan tur pa prevení su pueblo di adaptá na nan religion ku nan prostitushon religioso, sakrifisionan di beibinan, èts. E historia despues ta mustra ku ku Israel a desviá for di Dios nètamente pasobra e no a kumpli ku e instrukshon ku Dios a duna nan pa mata tur habitante di Kanaan.

Tambe algun hende tin e pregunta pakiko Dios a usa Israel pa mata e habitantenan di Kanaan. Pakiko e no a usa un forma milagroso manera El a hasi ku Sodoma i Gomora? Ma ta hopi visto den Tèstament Bieu ku Dios a usa un nashon pa kastigá otro. Por ehèmpel, e profeta Habakuk a lucha ku e pregunta pakiko Dios ta bai kastigá Su pueblo (ku e sa ta meresé kastigu) dor di un nashon ku tambe ta meresé kastigu, Asiria. Dios a kastigá Asiria despues. Ma tin ora, den Su soberania, Dios ta skohe pa usa hende pa kastigá otro. Den e kaso aki, Dios a usa Israel pa kastigá e kananeonan.

Ta na su lugá pa ripará Dios Su misericòrdia den Su rabia. Tabata por lo ménos 400 aña for di tempu ku Dios a deklará ku E lo kastigá nan i e kumplimentu di Su promesa. Ademas, nos no por lubidá ku Dios a spar Rahab i su famia pa motibu di nan fe (Josué 6:25).

B. SOLO I LUNA A PARA

Josué a hasi petishon na Dios, “*Solo, keda para na Gabaon; i abo, luna, den e vaye di Ajalon*” (10:12). Nos lo mensioná algun interpretashon di esaki. Ta un tiki difisil pa bisa eksaktamente kiko a sosodé e dia ei.

Algun ta bisa ku solo i luna mes a keda para, i ku por dokumentá esei. Segun nan, henter un dia (24 ora) ta falta den nos kalènder. Nan ta bisa ku ta pesei ún aña no ta presis 365 dia. Kada aña ta un tiki mas ku 365¼ dia—e motibu ku nos ta ahustá nos kalènder kada kuater aña, inkluyendo un dia adishonal.

Otronan ta interpretá e teksto di tal forma ku Josué a hasi petishon pa solo no briya asina kla pa un periodo di tempu pa e israelitanan—morto kansá den e solo kayente, mientras nan tabata pèrsiguí nan enemigunan—por haña alivio nesario di e calor di solo. Segun e punto di bista aki, Dios a manda un tempestat milagroso ku hagel komo kontesta di e orashon di Josué.

C. E KONKÍSTA

Kapítulonon 6-11 ta konta di e konkísta di e Tera Primintí. Josué a usa un bon strategia militar. Promé el a konkistá e parti sentral di e teritorio. Di e forma aki e por a isolá un parti di e enemigunan for di otro i fasilidat e konkísta. Ta notabel ku el a konkistá fortinan prinsipal riba kamindanan prinsipal di komersio den e serunan. Despues di konkistá e parti meimei di e Kanaan, el a dirigí su atenshon na e parti sùit (9-10), anto e parti nort (1:1-15).

Sin duda Dios Su poder milagroso a wòrdu manifestá. Na Jeriko, Dios a destruí e murayanan (Josué 6). Den un otro bataya, Dios a destruí e enemigunan ku hagel (10:10-11).

Ma di otro banda, Josué a hasi uso di táktikanan bon pensá, táktikanan ku e heteonan a usa e tempu ei: atakenan di sorpresa, marchanan den anochi, marchanan rápido, gaña e enemigu pa bandoná nan fortifikashon anto eliminá nan i kima e stat na lugá di rondoná e siudat pa lunanan i añanan largu promé ku por kapturá e stat.

D. DIOS DEN E BUKI

Josué ta prinsipalmente un buki teológiko. Dios a revelá Su mes den e buki.

E buki ta mustra bon kla ku Dios ta santu. E no ta tolerá rebeldia i maldat. E kananeonan a wòrdu destruí pa motibu di nan piká i desobedensia. Ma Dios a trata severo tambe ku piká di Israel. Ora un israelita e hasi piká, e konkísta no por a progresá te ora ku e pueblo a trata ku e piká (Josué 7). E implikashon ta kla: Dios no a duna Israel e Tera Primintí pa nan por gosa di dje irespekto di e manera ku nan a biba. Alkontrario, nan lo por keda den e tera solamente a base di e kondishon ku nan ta obedesé Esun ku a duna na e tera..

E gracia di Dios tambe ta destaká den e buki. Josué ta mustra ku Su gracia no ta limitá na Su pueblo so. Paganonan tambe ku ta “*invoká nòmber di SEÑOR lo ta salbá*” (Romanonan 10:13). Rahab a hasi esei i e ku su famia a skapa.

Dios ta presentá komo soberano riba kreashon. El a seka Riu Jordan, tumba murayanan di Jériko, manda hagel pa destruí enemigunan di Israel, èts. Talbes algun di e milagernan aki tambe a demonstrá Dios Su superioridat riba Baal, e dios di e kananeonan (ku nan a kere ta kontrolá yobida, hagel, sneu, i deluvionan).

Tambe e buki ta mustra ku Dios ta e Dios di Israel, ku E ta e Dios di universo, ku E ta un Guerero, èts.

E. NIFIKASHON SIMBÓLIKO DI E BUKI

Hopi hende ta kla pa buska un nifikashon simbóliko pa kualke teksto den Beibel. Hopi biaha, esei ta resultá den tur klase di splikashon kiboká. Tantu hende ku ta studia Beibel ta imaginá ku nan ta mira un òf otro siñansa den Beibel pasobra nan ta trose tekstonan pa forsa nan komuniká un mensahe simbóliko. Nos no ke ta kulpabel di esei.

Nos a tende di un pareha ku a kasa pa motibu di un mensahe tokante Jériko. E predikador a apliká Josué kapítulo seis, bisando ku si un yònkuman ke “konkístá” kurason di un yùfrou, e mester reklamá esei i kamna rònt di dje shete biaha, i e murayanan di resistensia den kurason di e yùfrou lo kai. E yònkuman a hasi esei i nan a kasa. E tabata un matrimonio turbulento. E pastor tabata kulpabel di trose e teksto literal di Josué 6 i oblig’è bisa algu ku e no ta bisa...un mensahe simbóliko.

Ma di otro banda, tin ora Beibel mes ta indiká ku tin un mensahe simbóliko den un òf otro teksto. E ora ei si ta na su lugá pa hasi uso di reglanan di interpretashon (hermenutika) pa yega na e komprendementu ku Dios ta deseá.

Hebreonan 4:8-11 ta indiká ku tin un mensahe simbóliko den e konkísta i habitashon di e Kanaan. Nos ke laga Skritura mes duna un pusíbel aplikashon simbóliko. Tabata Dios su intenshon pa Israel gosa e Tera Primintí, pa e ta (1) un lugá di sosiego [Levítiko 26:6; Deuteronomio 6:10-11], (2) un lugá di abundansia [Eksodo 3:8; Levítiko 26:5; Deuteronomio 11:10-12; 33:28], i (3) un lugá di triúnfo [Deuteronomio 7:1].

Hebreonan 3-4 ta papia tokante un sosiegu ku ta spera e pueblo di Dios awendia. Talbes e mensahe simbóliko ta referí na e bida kristian ora Kristo—no bo mes—ta sentral den bo bida...ora Spiritu Santu ta kontrolá i yena bo bida (Efesonan 5:18). Galationan 2:20 ta ekspres’è asina, “...*no ami ta biba mas, ma Cristo ta biba den mi...*” E apòstel Pablo a bisa, “...*pa mi, biba ta Cristo...*” (Filipensenan 1:21). Esaki ta un bida sosegando i triunfando den Kristo, gosando di Su abundansia!

Literatura Konsultá

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 285-299.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 1, p.235-272.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 72-74.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 107-117.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 137-151.
- Madvig, Donald H. Gaebelien, Frank E. ed. *The Expositor's Bible Commentary*: (Grand Rapids: Zondervan Publishing House, 1988), vol. 3, p. 237-252.
- Rea, J. Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p. 700-710.